



АСТАНА

АҚШАМЫ

АСАНӘЛІНІ ӘЛЕМ АРДАҚТАЙДЫ

Елордада өткен сенбі күні «ЭКСПО-2017» халықаралық мамандандырылған көрмесінің мәдени бағдарламасы аясында Қазақстанның Еңбек Ері, КСРО халық әртісі, Мемлекеттік сыйлықтың лауреаты Асанәлі Әшімовтің 80 жылдығына арналған «Астана» І дүниежүзілік театр фестивалі шымылдығын түрді. Мұнымен қоса әйгілі әртістің құрметіне кинопталық ашылды.



Киноапталықты «Қазақфильм» АҚ Мәдениет және Спорт министрлігінің тапсырысымен түсірген «Сыр тұнған Айсберг» атты өмірбаяндық деректі фильм ашты. Кинотуындыда сахна майталманының өмірі мен шығармашылығы жайлы сыр шертіліп, әріптестері мен достары естеліктермен бөлісті. Отбасы мүшелері де сөз сөйледі.

«Асанәлі Әшімов сияқты бірегей тұлғаның тағдырын бір фильмге сыйдыру мүмкін емес. Сондықтан фильмді түсіру өте күрделі болды. Асанәлі аға мен үшін аңыз адам. Ол туралы фильмді жастардан құралған шығармашылық ұжым болып түсірдік. Картинаны түсіруге 4 ай уақыт жұмсадық. Бұйыртыса, қыркүйек айында картина Алматыда жалпақ жұртқа көрсетіледі» дейді фильм режиссері Олжас Баялбаев.

Киноапталық 23 маусымға дейін созылады. Ал дүниежүзілік театр фестивалі әлі бір аптаға, яғни 26 маусымға дейін жалғасады. Осыған орай Бейбітшілік және келісім сарайында сахна саңлағының өмірі мен өнеріне арналған көрме ашылды. Көрермендер бұл көрмені аралап, алғашқы күні «Астана – Мюзикл» театры қойған Ж.Пресгурвиктің «Ромео мен Джульетта» мюзиклін тамашалады.

Фестивальге еліміздің атынан У.Шекспирдің «Асауға тұсау» комедиясын сахналаған «Жастар» театры, Р.Отарбаевтың «Бейбарыс сұлтан» тарихы драмасын көрерменге ұсынған М.Әуезов атындағы Қазақ мемлекеттік академиялық драма театры, бүгін Ш.Айтматовтың «Қызыл орамалды шынарым» лирикалық драмасымен сахнаға шығатын Қ.Қуанышбаев атындағы мемлекеттік академиялық Қазақ музыкалық драма театры қатысып жатыр.



Сондай-ақ, Еуропа мен Азияның ұжымдары – А.П.Чехов атындағы Мәскеу көркем театры (Ресей), Янка Купала атындағы Ұлттық академиялық театры (Беларусь), Қытай ұлттық театры (ҚХР), Даугавпилс театры (Латвия), Корей Республикасының «Мулькель» театры (Оңтүстік Корея), Шота Руставели атындағы Мемлекеттік кәсіби драма театры (Грузия), Берлин драма театры және К.Жантошев атындағы Ыстықкөл облыстық музыкалық драма театры (Қырғызстан) келіп қатысуда. Қырғыз бауырларымыз қазақ қаламгері, Мемлекеттік сыйлықтың лауреаты Сәбит Досановтың «Адамзаттың анасы» шығармасын алып келді.

Ал қазылар алқасының құрамында Сирежол Мари-Кристин (Франция), Милковски Томаш (Польша), Исафил Исафилов – (Әзірбайжан), Георгий Пряхин (Ресей) және Лаша Чхартишвили (Грузия) сынды театр мамандары бар. Ал төраға – Асанәлі Әшімов. Фестивальдің шымылдығын 26 маусым күні «Қазақстан» орталық концерт залында өтетін мерейтой иесінің шығармашылық кеші жабады.

**Аманғали ҚАЛЖАНОВ,
Құндыз ҚАНАҒАТҚЫЗЫ**